

- प्रधानमंत्री नरेन्द्र मोदी रांची सूँ वीडियो कॉन्फ्रेंस रे जरिये छह वंदे भारत रेलगाड़ियां ने रवाना कर्या –झारखण्ड मांय 660 करोड़ रूप्या री रेल परियोजनावां रो लोकार्पण कर्या अर नीव राखी ।
- राज्यपाल हरिभाऊ किसनराव बागडे कहर्या-लोकतंत्र मांय संवाद रो बत्तो महत्व है ।
- मुख्यमंत्री भजनलाल शर्मा कहर्या-कौशल विकास बाबत् स्टेट स्किल पॉलिसी बणा र मोटयारां ने प्रशिक्षित कर्यो जावेला । ।
- प्रदेश मांय मॉनसूनी बिरखा रा दौर मांय कमी-18 सितम्बर रे पछे मेह बरस्बा रा आसार ।

000

प्रधानमंत्री नरेन्द्र मोदी आज रांची हवाई अड्डे ऊं वीडियो कॉन्फ्रेंस रे जरिए टाटा नगर –पटना समेत छह वंदेभारत रेलगाड़ियां ने झंडी दिखार रवाना कर्या। इण सुं पैली श्री मोदी आज सुवांरे जमशेदपुर जाबा खातर रांची हवाई अड्डां पूग्या पण खराब मौसम रे चालता हैलीकाप्टर रवाना नी व्हे सक्यो। श्री मोदी झारखंड मांय छह सौ साठ करोड़ रूप्यां सूँ बत्ती री रेल परियोजनावां री भी नीव राखी अर लोकार्पण कर्या। प्रधानमंत्री वर्चुअल माध्यम सूँ जनता ने सम्बोधित करता थकां कहर्या के वंदेभारत रेलगाड़ियां रे चालबा सूँ झारखंड अर पड़ोसी राज्यां समेत देश रा पूर्वी हलकां मांय माली अर सांस्कृतिक गतिविधियां मांय तेजी आवेला। श्री मोदी कहर्या के इण रेलगाड़ियां सूँ पर्यटन उद्योग ने बढ़ावो मिलेला। इण सूँ रोजगार रा मौका मांय बढ़ोतरी व्हेला। वे कहर्या के केंद्र झारखंड रा चावता विकास खातर कमर कस राख्यी है। प्रधानमंत्री मोदी पी.एम. आवास योजना-ग्रामीण रा लाभार्थियां ने पैली किस्त जारी कर दीनी है। इण मांय 32 करोड़ रूप्या लाभार्थियां रा बैंक खातां मांय डिजिटल माध्यम सूँ भेज्या गया है। इण रे अलावा 32 हजार मकानां रा मंजूरी पत्र भी बाट्या गया है। श्री मोदी कहर्या के आवता पांच बरसा मांय दो करोड़ न्यारा मकान बणाया जावेला। वे कहर्या के आदिवासी, वंचित, दलित, दिव्यांग अर महिलावां ने इण सूची मांय प्राथमिकता दी जावेला। प्रधानमंत्री आज सूँ झारखण्ड, गुजरात अर ओडिशा री तीन दिन री यात्रा माथे है।

000

राज्यपाल हरिभाऊ किसनराव बागडे कहर्या के लोकतंत्र मांय संवाद रो बत्तो महत्व है। इण सूँ फैसला लिया जा सके है, सहमति बणे है अर लोकतंत्र मजबूत होवे है। वे कहर्या के भारतीय लोकतंत्र विश्वभर मांय सब ऊं बड़ो लोकतंत्र ही नी बल्कि यो संवाद सूँ लोक कल्याणकारी फैसला लेबा वाळां सूँ भी बड़ो राष्ट्र है। वे कहर्या के युवा शक्ति सूँ ही भारत भविष्य रो सब ऊं विकसित राष्ट्र बणेला। श्री बागडे आज जयपुर मांय "भारतीय युवा संसद" रा कार्यक्रम ने संबोधित कर रह्या है। कार्यक्रम मांय मौजूद विधानसभा अध्यक्ष वासुदेव देवनानी विश्व लोकतंत्र दिवस री बधाई देता थकां कहर्या के भारत मांय लोकतंत्र री जड़ां पुराण टेम सूँ घणी मजबूत रही है। वणा कहर्यो के अधिकारां रे साथै मोटयारां ने कर्तव्यां री कानी ऊं सजग रहणो चाहिजे। कार्यक्रम मांय 24 राज्यां सूँ आया युवां भाग लीना। "भारतीय युवा संसद" रा आशुतोष जोशी युवा संसद रा बारा मांय विस्तार सूँ जाणकारी दी।

000

आज इंजीनियर दिवस है। इण मौके केंद्रीय गृहमंत्री अमित शाह सगळा इंजीनियरां ने बघाई दी। सोशल मीडिया पोस्ट मांय श्री शाह कह्या के इंजीनियर देश रा विकास, नवाचार अर तरक्की मांय खास भूमिका निभावे है। वे आप रा महताऊं योगदान सूं देश रो भविष्य संवारे है। श्री अमित शाह महान इंजीनियर अर भारत रत्न सूं सम्मानित सर एम विश्वेश्वरैया ने श्रद्धांजलि देता थकां कह्या के वां री बहुमूल्य विरासत भारत रो भविष्य बणावा मांय इंजीनियरां ने प्रेरित करती रहवेला। इंजिनियर दिवस रे मौके प्रदेश री केई ठौड़ां माथे केई कार्यक्रम राख्या जा रह्या है। पाली मांय डिस्ट्रिक्ट क्लब मांय जिला इंजीनियरर्स फोरम री ओर सूं इंजीनियर दिवस मनायो गयो। ई मौके मौजूद लोग भारत रत्न इंजीनियर एम. विश्वेश्वरय्या री प्रतिमा माथे माला चढाई। इणी कड़ी मांय न्यारी-न्यारी होड़ां राखी गयी।

000

नगरीय विकास राज्य मंत्री झाबर सिंह खर्चा मेह बरसबा सूं टूटी सड़कां अर सीवरेज लाइनां ने तुरंत ठीक करबा रा निर्देश दिया है। श्री खर्चा आज जयपुर मांय राखी समीक्षा बैठक ने सम्बोधित कर रह्या हा। वे कह्या के सब ऊं पैली शहरां री खास सड़कां रो काम पूरो कर्यो जावे। इण रे पाछे कॉलोनियां रे भीतर री सड़कां ने ठीक कर्यो जावे। श्री खर्चा अधिकारियां ने आपसी तालमेल ऊं काम करबा री नसीहत दी।

000

मुख्यमंत्री भजनलाल शर्मा कह्या के किसान खेती रे अलावा लोगां खातर अन्न री व्यवस्था कर पुण्य रो काम करे है। आज जयपुर रा बैनाड़ा धाम मांय राख्या एक सामाजिक कार्यक्रम मांय मुख्यमंत्री कह्या के प्राकृतिक आपदावां सूं फसल खबरां रे बावजूद किसान री हिम्मत वां ने बिगड़्या हालात मांय भी आगे बढ़वा री प्रेरणा देवे है। वे कह्या के समाज रा लोगां ने आपसी मेल-जोल रे साथे देश री मजबूती खातर काम करणो चाहिजे। वे कह्या के मजबूत अर समृद्ध समाज री नींव शिक्षा माथे टिकी है, इण खातर राज्य सरकार मोटयारां ने आगे बढ़वा खातर भरपूर मौका मुहैया करा री है। वे कह्या के कौशल विकास खातर स्टेट स्किल पॉलिसी बणा र दो बरस मांय करीब डेढ़ लाख मोटयारां ने प्रशिक्षित कर्या जावेला।

000

दाऊदी बोहरा समाज आज ईद मिलाद-उन-नबी रो पर्व मना रह्यो है। पैगम्बर मुहम्मद साहब रा जन्मदिवस रे मौके डूंगरपुर मांय बैंड री धुनां रे सागे जुलूस कड़यो ग्यो। रंग बिरंगी पोशाकां मांय सज्यां धज्यां टाबर घोड़ां माथे झंडा ले र सवार व्हया। जुलूस शहर रा न्यारा-न्यारा रास्ता सूं हो र मस्जिद पूग्यो जठे, मजलिस राखी गयी ही। वठिने झालावाड़ जिला रा झालरापाटन, सुनेल खानपुर अर अकलेरा कस्बां मांय रहबा वाळा दाऊदी बोहरा समाज रा लोग परम्परागत रूप सूं ईद मिलाद-उन-नबी रो पर्व मनायो। राज्यपाल हरिभाऊ बागडे ईद मिलाद-उन-नबी रे मौके लोगां ने शुभकामनावां दी।

000

प्रदेश मांय न्यारा-न्यारा व्ह्या सड़क हादसां मांय 8 लोगां री मौत व्हे गयी। कोटा-जयपुर राष्ट्रीय राजमार्ग 21 माथे आज तड़के एक सड़क हादसा मांय 6 लोगां री मौत व्हे गयी। हादसा मांय तीन जणा घायल व्हे ग्या। पुलिस रे मुजब ये लोग मध्यप्रदेश रा देवास ऊं सीकर मांय खाटूश्याम जी रा दर्शन खातर जा रह्या हा। इण दौरान बूंदी रे कने हिंडोली मांय सिरधालुआं री कार बजरी सूं भर्या ट्रक सूं टकरा गयी जिण सूं यो हादसो व्हयो।

वठिने दूजो सड़क हादसो बीती देर रात टोंक जिला रा बरौनी थाना हलका मांय व्हयो जठे अजमेर दरगाह सूं घरां लौट रह्या जायरीन री गाड़ी डिवाइडर सूं टकरा गयी। इण हादसा मांय दो जणा री मौत व्हे गयी अर 9 जणा घायल व्हे ग्या।

000

प्रदेश मांय आज बत्ता ज़िला मांय मौसम सूखो रह्यो हालाकि लारला 24 घंटा मांय पूर्वी राजस्थान मांय कठे-कठे बादळ गरजबा रे साथे हल्को मेह बरस्यो। बारिश रो मौजूदा दौर रूकबा रे पाछे धौलपुर, करौली, भरतपुर अर अजमेर मांय जलभराव रा हालात मांय तेजी सू सुधार व्हे रह्यो है। ज़िला प्रशासन राहत कामा मांय जुड़योड़ो है। जैसलमेर ज़िला मांय इण टेम चोखो मेह बरस्यो। म्हाणा खबरनवीस रे मुजब इण टेम ज़िला मांय औसत सू 90 फीसदी बत्तो मेह बरस्यो।

वठिने इण बीच मेहकमो 18 सितम्बर रे पाछे मेह बरस्बा री संभावना जतायी है।

000

प्रधानमंत्री रा "सेवा से सीखे" विजन रे तैत युवा स्वयंसेवक "चिकित्सा अर भारतीय डाक विभाग" रे सागे प्रशिक्षण ले र आम लोगां री मदद करैला। केन्द्र सरकार रा युवा कार्यक्रम अर खेल मंत्रालय री कानी ऊं भारत इनिशिएटिव रे तैत युवावां ने चिकित्सा अर डाक मेहकमां री गतिविधियां सूं रूबरू कराबा खातर "माय भारत पोर्टल" माथे प्रशिक्षण कार्यक्रम रे तैत आवेदन कर्या जा रह्या है। 15 सूं 29 बरस रा इच्छुब युवां इण लर्निंग प्रोग्राम रे तैत सामान्य चिकित्सालय री कानी ऊं 17 सितंबर सूं पोस्टल डिपार्टमेंट कानी ऊं 23 सितंबर सूं करीब 1 महीना ताईं विभागीय गतिविधियां री जाणकारी दी जावेला।

000

राष्ट्रीय आयुर्वेद संस्थान मांय आयुष मंत्रालय अर राष्ट्रीय आयुर्वेद विद्यापीठ री कानी ऊं छह दिन रो सी.एम.ई. कार्यक्रम पूरो व्ह्यो। कार्यक्रम मांय देशभर रा 20 राज्यां सूं आया 30 आयुर्वेद चिकित्सा अधिकारी भाग लिना। वठिने 12 आयुर्वेद विशेषज्ञ आप रा अनुभव साझा कर्या।

000